

Moneda

Aruba ta hanya moneda di cinco florin pa substitui esun di papel

Elo ta chikito y vierkant

ORANJESTAD - Awe Minister di Finanzas, Armand Engelbrecht ta viaha pa Hulanda pa hiba comersacionnan e.o. cu su colega, e secretario di finanzas y alabes presidente di e comision di e problematica di debe Van Lennep y e presidente di Banco Central di Hulanda.

Otro siman Diahuebs nos minister lo ta na e fabrica di "De Nederlandse Munt", pa asina e por traha e prome moneda di Aruba di cinco florin !

Banco Central di Aruba a duna instruccion na e compa-

nia aki pa nan traha un moneda cu lo ser poni den circulacion na Aruba y cu lo tin e balor di cinco florin.

E minister ta regresa Aruba dia 23.

Nos a tuma contacto awe mainta cu e presidente di Banco Central, Hans du Marcie Sarvaas pa puntré ki ta e doel pa saca un moneda di 5 florin, siendo cu ya caba nos tin un papel di e mesun denominacion. Ela splica cu e moneda aki lo reemplaza gradualmente e papel di cinco florin.

Tin un tendencia mundial cu papelnan di denomina-

cionnan chikito ta ser substitui pa moneda. Esey ta loke nos ta mira na Alemania, Hulanda y tambe otro paisnan ta bayendo den e direccion ey.

E motibo ta simpel. Papel ta gasta, susha y danya mas liher, siendo cu moneda ta mucho mas duradero.

Cuanto lo bin den circulacion no ta conoci ainda, ya cu e demanda publico lo determina esey. Nan a cuminsa pa trahá un cierto cantidad y gradualmente nan lo bai trahando mas. Nan ta imagina incluso cu e cantidad lo por ta mas grandi cu loke nan tin actualmente den circulacion

na papel, cu ta f.2.548.385. Ta conoci cu hende ta gusta spaar moneda y ta normal cu bishitantenan hopi biaha ta regresa cu un of mas, como recuerdo.

Aunke cu e mes no a mira e moneda ainda, como cu ta otro siman e ta ser imprimi of manera nan ta bisa batí, e presidente por a bisa nos cu elo ta un moneda chikito, co-

lor di nickel y su forma lo ta vierkant. E ta kere cu e moneda aki lo bai hala atencion.

E proyecto mes ta data prome cu su tempo, pero tog e por agrega cu e disenyo a ser hasi pa Evelino Fingal. Esey den corto ta e storia riba e moneda di cinco florin cu proxicamente lo bin den circulacion.